

gorum qui arbitrantur eam in reprobis nunquam esse desitaram; quia reprobi ob peccata mortalia quibus detinentur , cujuscumque veniae sunt incapaces , etiam pro culpis levioribus a se admissis.

4º Peccata venialia sæpe repetita disponunt hominem ad mortaliter peccandum, ut constat 1º ex Scriptura sacra dicente, Eccli. xix, 1: *Qui spernit modica , paulatim decidet*; et Luc. xvi, 10: *Qui in modico iniquus est, et in majori iniquus erit*; 2º ex sanctis Patribus et consensu omnium theologorum, affirmantium peccata venialia sedulo cavenda esse, ne labamur in mortalia; 3º ex ratione: facile enim intelligimus peccata venialia multiplicata fervorem charitatis , timorem Dei et horrorem peccati minuere , leves transgressiones sæpe iteratas ad graviores præsertim in eadem specie disponere , ut constanti experientia confirmatur. Ergo.

Hinc patet quam periculose levia negligantur peccata , maxime ab iis qui ad majorem tenentur perfectionem , ut sunt : 1º sacerdotes missam arido corde celebrantes , sine præparatione , sine gratiarum actione, sanctissima religio- nis mysteria præcipitanter et indecora tractantes; 2º clerici in sacris divinum officium sine attentione et devotione re- citantes, otio, ludis, sensualitati indulgentes , de Deo sæpe loquentes et parum cogitantes ; 3º juvenes clericatum am- bientes, et in negligentia, torpore, perpetua levitate viven- tes, etc.

CAPUT TERTIUM.

DE PECCATIS COMMISSIONIS ET OMISSIONIS.

Peccatum *commissionis* est transgressio præcepti nega- tivi, et fit id quod prohibetur agendo , v. g., furando , occidendo , etc.; et peccatum *omissionis* est transgressio præcepti positivi, fitque omittendo quod præcipitur, v. g., eleemosynam, missæ auditionem, etc.

Certum est omnia peccata in peccata commissionis et

omissionis adæquate dividit: « Duobus modis enim constat » esse peccatum , si aut fiunt illa quæ prohibitur, aut » illa non fiunt quæ jubentur , » ait recte *Cœlestius* apud S. Aug., lib. de Perfectione justitiae, cap. 5.

Negari igitur non potest dari peccata omissionis sicut et commissionis. Inter ea hæc datur differentia , quod scilicet omissio non semper sit illicita , sed tantum si locum habeat tempore quo urget præceptum affirmativum , dum commissio mali nunquam licita est : præceptum quippe affirmativum obligat semper, sed non pro semper , præceptum vero negativum obligat semper et pro semper.

1º Nulla omissio est imputabilis ad peccatum sine actu voluntatis; imputabilis enim esse non potest sine aliquo libertatis exercitio : porro nullum fieri potest libertatis exercitium sine actu voluntatis : ergo.

2º Actus bonus vel indifferens , qui est causa culpabilis omissionis , malitiam ipsius omissionis contrahit, et aliam non habet : unde in confessione sufficit omissionem declarare , v. g.: si quis sacram die dominica ad studendum omiserit, sufficit quod dicat se missam sine ratione sufficienti omisisse. Si vero causa propriam haberet malitiam, v. g., si quis missam ad furandum omisisset , utramque malitiam aperire teneretur, *ut patet*.

Actus in se bonus , qui non nisi concomitanter ac peccatum omissionis fit, non ex eo vitiatur.

3º Qui scienter ponit causam omissionis , eo instanti ipsius malitiam coram Deo contrahit, etsi omissio reipsa non sequatur , eamque confiteri tenetur; sed peccatum externum non consummatur , et poenæ , si quæ sint, non incurruunt , nisi tempore quo fit omissionis , ut in Tractatu de *Actibus humanis*, p. 449, ostendimus.

Qui ex justitia aliquem corripiere tenetur , et correptionem culpabiliter omittit, tot facit peccata, si ea præviderit, quot faciet non corruptus , quia mali effectus malitiam suam communicant causæ. Qui, e contra , ad correptionem ex sola charitate teneretur , eam omittendo , unum duntaxat admitteret peccatum contra charitatem , eo gra- vius quo plura faceret non corruptus. De peccatis autem

alienis specialius agemus in Tractatu *de Justitia*, ubi de perversis mandatis, consiliis et exemplis dicemus.

Notandum 1º peccatum commissionis et peccatum omissionis specie differre, etiam quando eidem praecepto opponuntur, quia diverso modo ei adversatur, ut odium Dei et omissio actus amoris: igitur qui Deum odisset, peccatum suum non sufficienter declararet, dicendo se contra charitatem divinam peccasse.

Notandum 2º peccatum commissionis, ceteris paribus, gravius esse peccato omissionis, quia gravius est malum objectum amplecti quam bono non adhaerere, v. g., Deum odisse, quam actum charitatis non elicere; hominem in puteum projicere, quam illum alterius malitia projectum non retrahere; actio enim ex se denotat firmorem animi determinationem majoremque a bono aversionem.

CAPUT QUARTUM.

DE PECCATIS CARNALIBUS ET SPIRITALIBUS, EX INFIRMITATE ET EX MALITIA, CONTRA DEUM, PROXIMUM ET SEIPSUM, CORDIS, ORIS ET OPERIS.

1º Ea peccata dicuntur *carnalia*, quae delectationem carnalem habent pro objecto, ut gula et luxuria; et ea quae spiritualem habent pro objecto, vocantur *spiritualia*, ut sunt superbia, invidia. Sic dividi posse peccata supponit Apostolus, dicens, II Cor. vii, 1: *Mundemus nos ab omni inquinamento carnis et spiritus*. Si autem in Epistola ad Galatas, cap. v, odium, invidiam et alia peccata quae non consummantur in carne, inter opera carnis recenseat, id intelligendum est de operibus ab homine carnali factis, quo sensu ipsa peccata spiritualia, opera carnis dici possunt.

2º Peccatum quod fit ex passione antecedente, non volita in se, nec in causa, dicitur *ex infirmitate*, quia passiones sunt velut animae aegritudines: peccatum vero quod

fit ex plena libertate, absque ignorantia intellectus et passione voluntatis, dicitur *ex malitia*. Est omnium in genere suo gravissimum, quia nulla ratione excusari potest, dum peccata ex ignorantia et passione antecedente provenientia, in ratione liberi minuuntur, *ut alibi diximus*.

Peccata ex prava consuetudine, quam quis emendare non curat, commissa, peccatis malitia equivalent: « *M*anifestum est quod quicumque peccat ex habitu, peccat » ex certa malitia, » inquit S. Thom., I 2, q. 78, art. 2. Consuetudo enim minime retractata liberationem antecedentem nullo modo excludit: tota igitur imputabilis est ac consequenter peccata ex illa nascentia non excusantur nec minuuntur. Unde qui talem constitudinem peccandi, eam quamprimum efficaciter retractare sub mortali tenentur.

3º Omnia peccata sunt contra Deum, contra proximum, vel contra nosmetipsos, prout adversantur virtutibus quae specialiter habent pro objecto Deum, proximum vel nosmetipsos: verum nulla est obligatio declarandi in confessione an sint contra Deum, proximum aut nosmetipsos, quia, specie declarata, eorum objectum statim intelligitur.

4º Alia sunt peccata *cordis* quae exterius non prodeunt, v. g., perverse cogitationes, de quibus sufficienter diximus in *Supplemento ad Tractatum de Matrimonio*, agendo de delectatione morosa; alia dicuntur *oris*, quia solo sermone consummantur, ut detractio, contumelia, mendacium; alia sunt *operis*, quia in solo opere externo perficiuntur, ut furtum, homicidium. Haec peccata saepe inchoantur cogitatione, incrementum accipiunt sermone et consummantur opere; tunc ejusdem sunt speciei; at diversos habent gradus in confessione declarandos, ubi actus sunt distincti, si nempe aliquis sisterit in cogitatione, vel in sermone, etc.

Notandum peccata cordis seu mere interna multo facilius multiplicari quam peccata externa.

CAPUT QUINTUM.

DE PECCATIS CAPITALIBUS.

Quod est inferiorum principium et directivum dicitur caput, ducta metaphora a capite animalis totum animal dirigente. Eo sensu quædam peccata dicuntur capitalia, quia aliorum sunt causa, fons, principium, non vero quia sunt opium maxima, nec quia sunt semper mortalia. Illorum divisio et numerus non fundantur in Scriptura, nec in ulla conciliorum definitione: *S. Greg. Magnus*, lib. 31 Moral. cap. 15, primus septem hæc vitia exhibuit ut capitalia, eaque exercitum diaboli vocat, cui superbia velut regina imperat. Post eum *S. Th.*, 1 2, q. 84, art. 4. et unanimiter theologi septem agnoscent capitalia peccata, quæ sunt: superbia, avaritia, luxuria, invidia, gula, ira et acedia. De iis singulatim et breviter dicemus, excepta luxuria, de qua in speciali dissertatione tractamus.

ARTICULUS PRIMUS.

DE SUPERBIA.

Superbia est, juxta *S. Th.*, 2 2, q. 162, *inordinatus appetitus propriæ excellentiæ*. Nomine appetitus intelligitur amor, desiderium et complacentia.

Signa et characteres hujus appetitus sunt: 1º seipsum supra realitatem aestimare; 2º bona ad propriam excellentiam spectantia, ut virtutem, scientiam, fortitudinem, etc., ad Deum et ejus gloriam saltem ultimate non referre; 3º ab aliis velle aestimari, honorari, laudari, et, si non faciant, tristari, dolere, irasci; 4º proprio judicio pertinaciter adhærere; 5º alias aspernari, aliena parvi pendere, se suaque pluris aestimare; 6º putare se habere bona quæ non sunt, aut majora quam sunt; 7º propriam excellentiam in eo ponere ubi non est; 8º credere se sua bona a Deo non accepisse, aut propriis viribus obtinuisse, quod

DE PECCATIS.

57

tamen ad superbiam non necesse est; sed satis est quod, consideratis bonis sine respectu ad Deum, in iis sibi complaceat et perinde se gerat ac si illa a Deo non haberet; tale fuisse peccatum Angelorum in cœlo plurimi docent; 9º nolle superioribus suis se submittere, quasi id sit indignum vel indecorum; nullius consiliis aut præceptis parere, sed proprio arbitratu vivere, etc.

Certum est superbiam ex genere suo esse peccatum mortale; nam 1º *Prov. viii*, 13, Deus dicit: *Arrogantium et superbiam detestor*, et *B. Paulus*, *Rom. 1*, 30, ponit superbos et elatos inter eos qui digni sunt morte; 2º superbia honori, majestati et excellentiæ Dei adversatur: ergo objectum ejus ex natura sua grave est; 3º est radix omnis peccati, ut expresse legitur *Ecli. x*, 15: *Initium omnis peccati est superbia; qui tenuerit illam, adimplebitur maledictis, et subvertet eum in finem*. Ergo.

Sæpe tamen est peccatum veniale, etiam ratione objecti, si nempe sit imperfecta, v. g., si quis, absque Dei aliorumve contemptu, superioribus subjici non renuens, se omnia Deo debere confitens, tantum plus æquo se extollat, vel in propria excellentia nimis sibi complaceat, finem suum ultimum in Deo nihilominus semper reponens.

At quis Luciferum superbiam devictum et cum eo innumeros spiritus perfectos, atque primum hominum parentem cum universo genere humano similiter superbia prostratum serio considerans, non paveat et contremiscat?

Filiæ hujus vitii sunt: præsumptio, quæ est inordinata cupiditas aliquid facultatem nostram excedens faciendi; ambitio seu inordinata cupiditas honoris, dignitatis vel potentiarum; et vana gloria, quæ est inordinata cupiditas humanae estimationis et laudis: ad eam, juxta *S. Gregorium* et *S. Th.*, 2 2, q. 132, art. 5, septem alia referuntur peccata, nimirum inobedientia, jactantia, hypocrisis, contentio, pertinacia, discordia et inventio novitatum.

Remedia superbiae ejusque filiarum sunt præcipue: 1º humilitatem frequenter et enixe a Deo petere; 2º suum nihilum, suam effrenatam in malum propensionem, suas innumeratas miserias, tum corporis, tum animæ, ante ocu-

los semper habere; 3º supremam Dei excellentiam et infinitam ejus bonitatem erga nos continuo recordari, hæc B. Pauli verba, I Cor. iv, 7, nobis applicando : *Quid habes quod non accepisti? Si autem accepisti, quid gloria-ris quasi non acceperis?* 4º poenas superbiæ et humilitatis præmia sœpe meditari: *Deus superbis resistit, humilibus autem dat gratiam*, I Petr. v, 5: *Qui se exaltaverit, humiliabitur, et qui se humiliaverit, exaltabitur*, Matth. xxviii, 12; 5º exempla Christi, qui semetipsum exinanivit, frequenter sibi repræsentare; 6º actus internos et externos humilitatis crebro exercere, etc.

ARTICULUS SECUNDUS.

DE AVARITIA.

Avaritia est amor inordinatus divitiarum; quo nomine intelliguntur res quælibet sensibiles, pecunia aestimabiles, ut agri, domus, pecora, vestes, panni, etc. Est peccatum ex genere suo mortale, ut constat 1º ex Eccli. x, 9: *Avaro nihil est scelestius.... nihil est iniquius quam amare pecu-niam; hic enim et animam suam venalem habet;* et ex B. Paulo, Eph. v, 5: *Avarus, quod est idolorum servitus, non habet hæreditatem in regno Christi et Dei.* Ergo.

Peccatum est mortale quando quis, ad acquirendas, augendas aut conservandas divitias, adhibet media graviter illicita, aut paratus est mortaliter peccare, aut reipsa mortaliter peccat. v. g., bonum alienum accipiendo vel detinendo, mala fide in contractibus utendo, eleemosynam omittendo ubi eam dare tenetur, etc. Si quis vero divitias superflue quidem amet, sed propter eas aliquid grave facere nolit contra Deum aut proximum, venialiter tantum peccat, ut docet S. Th. 2 2, 118, q. art. 4, et communiter alii.

Qui volunt divites fieri, incident in tentationem et in laqueum diaboli, et desideria multa inutilia et nociva, quæ mergunt homines in interitum et perditionem. Radix enim omnium malorum est cupiditas, I Tim. vi, 9. His verbis clare exprimitur quomodo avaritia sit peccatum capitale.

Filiæ ejus sunt: 1º obduratio cordis super egenorum miseria, eis non compatiendo, non opitulando, eos objurgando, credita dure exigendo, debita tarde solvendo, præceptum eleemosynæ negligendo, etc., 2º inquietudo cordis divitiis acquirendis et conservandis semper implicati, cum inani timore eas non acquirendi vel amittendi; 3º violen-tia qua res alienæ injuste usurpantur; 4º fallacia sive dolus ad alios dictis aut factis decipiendos, et fraus, quæ est astuta proximi deceptio per sola facta; 5º perfidia, qua fides in promissis, pactis et rebus creditis violatur; 6º pro-ditio, quæ est injusta rei alicujus manifestatio contra fidem promissam, in alterius detrimentum, etc.

Præcipua contra avaritiam remedia sunt: oratio, medi-tatio honorum cœlestium, vanitatis bonorum terrestrium, paupertatis Christi, mortis ejusque consecutariorum, etc., crebra eleemosynarum largitio facultatibus nostris proportionata, miserorum visitatio, in jactura bonorum resigna-tio, etc.

ARTICULUS TERTIUS.

DE INVIDIA.

Invidia est animi tristitia de bono proximi, quatenus ab eo videmur æquari aut superari; quia scilicet æstima-mus propriam excellentiam nostram inde minui. Procedit ex superbia, et ex genere suo peccatum est mortale; B. Paulus enim, Gal. v, 21, eam inter peccata quæ a consecutione regni celorum excludunt reponit, et in libro Sap., II, 24, legitur: *Invidia autem diaboli mors introivit in orbem ter-rarum: imitantur autem illum qui sunt ex parte illius.*

Filiæ hujus vitii, juxta S. Greg. et S. Th. 2 2, q. 36, art. 4. sunt: odium, susurratio, detractio, exultatio in ad-versis proximi, et in ejus prosperis afflictio. Susurratio est sermo quo, sine justa causa, aliquid refertur uni personæ aptum ad amicitiam ejus cum alia persona dissolvendum: cum autem vera amicitia maximum sit bonum, juxta hæc Eccli., VI, 14, verba: *Amicus fidelis, protectio fortis; qui invenit illum invenit thesaurum, susuratio est gravissimum*

peccatum. Unde 1º Eccli. xxi, 31 : *Susurro coinquinabit animam suam, et in omnibus odietur*; et 2º B. Paulus, Rom. i, 29, inter eos qui digni sunt morte numerat, *plenos invidia, malignitate, susurrones, detractores... sine affectione, etc.*

Remedia invidiae sunt : 1º considerare quod illa nihil proficiat invidenti, sed e contra illi graviter noceat, illum amicitia Dei privando; 2º gaudere de bono proximi, quatenus est proximus, quia illum sicut nosmetipsos diligere debemus; 3º ei de bono habito gratulari, illum laudare, pro illo orare; 4º gloriam humanam despicere ac contemnere, secundum B. Apostoli consilium, Gal. v, 26 : *Non efficiamur inanis gloriae cupidi, invicem provocantes, invicem invidentes.*

Notandum invidiam differre 1º ab æmulatione, quæ est tristitia de bono proximi, non quia proximus illud habet, sed quia nobis deest : unde si illud legitime habere possimus, illud æmulando non peccamus; si vero illud legitime habere non possimus, aut illius incapaces simus, æmulatio est peccatum mortale aut veniale, juxta gravitatem inordinationis; 2º ab indignatione, quæ est tristitia de bono proximi, quatenus proximus illo judicatur indignus : fieri potest ut quis justissime indignetur, v. g., de collatione officii magni momenti homini evidenter indigno: sedulo tamen cavendum est a judicio temerario, et ab ipsa invidia; 3º ab odio, quod est tristitia de bono proximi sine respectu ad imminutionem boni nostri, ex sola proximi displicentia proveniens.

Tristitia de alterius elevatione ob injustum nocumentum ab eo timendum, non est invidia, sed legitimus timor.

ARTICULUS QUARTUS.

DE GULA.

Gula est inordinatus cibi aut potus appetitus : unde duplíciter hoc peccatum committi potest, nimirum per excessum in cibo aut in potu non inebriativo, et dicitur crapula, et per excessum in potu inebriativo, et dicitur ebrietas.

De crapula.

Crapula ex genere suo est peccatum mortale, siquidem B. Paulus eam inter peccata a regno cœlorum exclusi-tia collocat, Gal. v, 21, nominans *comessationes*; et gravem habere potest deformitatem, si nempe 1º quis paratus sit mortaliter peccare ad oblationibus cibi vel potus fruendum, et tunc in eis finem ultimum ponit, juxta hæc Apostoli verba, Philipp. iii, 19 : *Quorum deus venter est*; 2º si ita dispositus sit ut nihil aliud querat quam edendi et bibendi voluptatem; 3º si per cibi vel potus excessum valetudini sue graviter noceat; 4º si ob voluptatem edendi vel bibendi usque ad vomitum scienter se ingurgitet, quia, etiam seclusis scandalo et ebrietate, hoc gravem continet inordinationem; 5º si voluntarie ad vomitum se excitet, ut iterum propter voluptatem edat, sicut de Vitellio refertur : hoc quippe naturam rationalem valde dedecet; 6º si absque necessitate, carne humana aut sanguine vescatur; ad hoc enim tanquam a re valde inordinata et extrema feritatis semper abhoruerunt omnes gentes non penitus barbaræ; 7º si grave præbeat scandalum, puta si religiosus vel clericus comessionibus in loco publico nimis indulget.

Extra hos casus, peccatum gulæ est solum veniale, ut docent S. Thomas, 2 2, q. 148, art. 2, et generaliter theologi.

Peccatum gulæ, sive mortale, sive veniale, quinque modis sequenti versu expressis committi potest :

Præpropere, laute, nimis, ardenter, studiose.

Qui congruum comedionis tempus prævenit, v. g., die jejunii, *præpropere* peccat; qui cibos pro statu suo nimis delicatos requirit, peccat *laute*; qui mensuram moderata refectionis excedit, peccat *nimirum*; qui avide sumit cibos, etiam viles, peccat *ardenter*; tandem qui vult cibos nimis accurate et sapide præparatos, relative ad suam conditio-nem, peccat *studiose*.

Quinque illi modi satisfaciendi gulæ enumerantur a S. Gregorio, lib. 30 Moral., cap. 18.

Naturali sapore cibi et potus frui non est per se peccatum; infirmitas enim humana non tantum cibo et potu, sed et ipso sapore indiget, ut refectionem suam sumere valeat. Verum edere aut bibere propter saporis voluptatem, peccatum est veniale, ut communissime docent theologi. Unde Innocentius XI sequentem damnavit propositionem: «Comedere et bibere usque ad saturitatem, ob solam voluptatem, non est peccatum, modo non obsit valetudini, quia licite potest appetitus naturalis suis actibus frui.»

Notandum quamdam esse decentiam statui proportionatam in delectu et copia ciborum, sicut in supellectili et vestibus, quam modeste et pura intentione servare non est peccatum.

De ebrietate.

Ebrietas est excessus in potu usque ad violentam rationis privationem: igitur malitia ejus in eo praeceps sita est, quod homo sciens et volens, directe vel indirecte, cum tali excessu bibat ut usu rationis careat.

Ebrietas perfecta et voluntaria semper est peccatum mortale: constat 1º ex Scriptura, I Cor. vi, 10: *Neque ebriosi regnum Dei possidebunt*, Gal. v, 21; ebrietates numerantur inter opera carnis, quæ a consecutione regni Dei impediunt: 2º ex SS. Patribus et Ecclesiæ doctoribus, qui unanimi ore pronuntiant ebrietatem esse malam in se et peccatum mortale; 3º ex ratione; nonne gravis est disformitas naturæ rationali repugnans, se ita ad brutorum stoliditatem abjecere, et imaginem Dei in se sic voluntarie deturpare? Ergo. Unde ebrietas est intrinsece mala, ac proinde se inebriare non licet etiam ad servandam vitam.

Signa autem perfectæ ebrietatis sunt: 1º si quis inter licitum et illicitum jam non discernat; 2º si solita officia exercere nequeat; si postridie non neminit quid dixerit aut fecerit, quomodo domum redierit, etc.; 4º si ea fecerit quæ nunquam integra mente facere consuevit, v. g., si absurdâ dixerit, si turpia protulerit, si familiam turbaverit,

uxorem verberaverit, etc., dum hæc nunquam faciebat.

Perfectæ autem ebrietatis *non sunt signa certa*, inquit S. Ligoriūs, *hæsitatio linguae, titubatio pedum, nec objecta videre duplicita aut titubantia.*

Qui alios excitant ad bibendum, vel, absque causa excusante, potum se inebriaturis præstant, inebrietatis eorum fiunt participes.

Ebrietas imperfecta sæpe est mortalis ratione scandali, periculi alteriusve circumstantiæ ei annexæ; secus est duntaxat venialis.

Filiæ gulæ, juxta S. Greg., sunt: inepta lætitia, scurritas, immunditia corporis, multiloquium et hebetudo mentis.

Qui ad serviendum gulæ, per crapulam aut ebrietatem, inclinantur, sequentia Christi verba sæpe meminerint: *Attendite vobis, ne forte graventur corda vestra in crapula et ebrietate, et curis hujus vitæ, et superveniat in vos repentina dies illa.* Luc. xxi, 34.

ARTICULUS QUINTUS.

DE IRA.

Ira, quæ etiam dicitur iracundia, est inordinatus vindictæ appetitus.

Dicimus *inordinatus*, quia fieri potest ut vindicta ordinata appetatur, et tunc ira non est peccatum: unde Psalmista dicit, Ps. iv, 5: *Irascimini, et nolite peccare.*

Duplici modo autem vindicta inordinate appeti potest, nempe 1º si optetur ei qui eam non meruit, vel ultra quod meruit, et tunc ira ex genere suo est peccatum mortale; idcirco B. Paulus, Gal. v, 20, eam inter peccata a regno Dei excludentia numerat. Sæpe tamen est venialis ob defectum advertentiæ sufficientis, vel ob levitatem materiæ. 2º Si quis justam vindictam appetendo, nimis ardenter irascatur interius, si nimis exterius manifestet signa iræ; in eo casu ira rationem peccati venialis per se non excedit. Sic S. Th., 2 2, q. 158, art. 3. Potest tamen esse mortalis ratione scandali, blasphemiae, injuriæ, maledicti, convicii, etc.

Filiæ iræ, a S. Gregorio numeratæ, sunt : indignatio, tumor mentis, contumeliam, rixæ, clamor et blasphemia, quarum ordo a S. Th. sic consideratur, art. 7 : « Ira in quantum est in mente, gignit indignationem et tumor rem mentis ; in quantum est in ore, producit clamor rem, contumeliam et blasphemiam ; in quantum translat ad facta, generat rixas, ad quas referuntur pugnæ et omnia nocumenta quæ ex ira proximo inferuntur. »

Ejus remedia sunt præcipua : 1º considerare quam sit injusta et perniciosa ; 2º orare, et mansuetudinem Christi meditari ; 3º nihil agere aut loqui in motu iræ, sed exspectare donec quiescat ; 4º motus iræ impedire, aut nascentes statim reprimere, et frequentes actus mansuetudinis, patientiæ ac humilitatis exercere.

ARTICULUS SEXTUS.

DE ACEDIA.

Acedia generatim est torpor circa spiritualia, et sic spectata non est peccatum speciale, sed potius circumstantia cuiuslibet peccati ; siquidem omne vitium est torpor circa bonum spirituale sibi oppositum.

Acedia specialiter sumpta, prout est peccatum capitale, est tristitia seu tedium de bono spirituali ad nos pertinente, ut sunt gratia Dei, sacramenta, observantia divorum præceptorum, virtutes Christianæ, etc.

Differt ab odio Dei, quo bonum prout est in Deo aversatur, et ab invidia que est tristitia de bono prout est in proximo; acedia enim respicit bonum spirituale prout est vel esse potest in nobis.

Est de genere suo peccatum mortale, juxta S. Th., 2 2, q. 35, art. 3, et omnes alias doctores, quando versatur circa necessaria ad salutem, vel circa ea quæ graviter sunt præcepta : secus, est solum peccatum veniale, plus minusve notabile, juxta gradum tædii et periculi ulterius progrediendi, dummodo necessaria aut præcepta non omittantur. Ut filiae acediae numerari solent mentis evagatio, torpor, rancor, pusillanimitas, malitia et desperatio.

1º Evagatio mentis in exercitio spirituali graviter præ-

cepto, v. g., in recitatione officii divini, et perfecte voluntaria in se vel in causa, est peccatum mortale, si in parte notabili perseveret ; in oratione non præcepta, est duntaxat peccatum veniale.

2º Torpor est languor animi quo bonum omittitur aut fit negligenter ; in iis quæ graviter præcipiuntur est mortalis : *Maledictus qui facit opus Domini fraudulenter*, et in Septuaginta interpretibus, negligenter, Jerem. XLVIII, 10 : semper valde periculosus est et ad mortale disponit.

3º Rancor est fastidium et quedam indignatio adversus eos qui nos excitant ad virtutem ; indicium est animæ in servitio Dei saltem graviter periclitantis.

4º Pusillanimitas est proprietatum virium diffidentia, qua quis opera ardua et sua officia refugit aut negligit, sicut servus piger Evangelii, qui acceptam domini pecuniam fudit in terram. Matth. XXV, 18.

5º Malitia in eo consistit, quod quis, ob difficultates in servitio Dei superandas, bona spiritualia odit, vellet ea non esse, beneficium Dei contemnit, v. g., optaret se Christum non agnovisse, alteram vitam non existere, se bestiis esse similem, etc. Nullum est dubium quin sit mortalis ubi est plene voluntaria.

6º Desperatio, qua quis de consecutione felicitatis aeternæ desperans, omne salutis studium postponit, peccatum est mortale.

Hinc patet quam periculosa et in negotio salutis timenda sit acedia : omnem devotionem exsiccat, vires extenuat, zizania vitiorum spargit, mentis stuporem et obscuritatem inducit, eamque ita hebetat et corrumpt, ut solidorum virtutis officiorum fiat incapax : semper igitur meminerimus hæc Apostoli verba, Rom XII, 11 : *Sollicitudine non pigri, spiritu feroentes, Domino servientes* ; metu judiciorum Dei et intuitu ejus præmiorum semper nos excitemus ad officia nostra accurate et jugiter implenda.

FINIS TRACTATUS DE PECCATIS.